

Headlines

- लैफ्टिनेंट गवर्नर मनोज सिन्हा होरें किश्तवाड़ च राहत कम्में दा लेया जायजा। तबाह होई गेदे घरें-मकानें दे परतियै निर्माण दा दोआया भरोसा।
- मुखमंत्री उमर अब्दुल्ला होरें हाड़ें दी मारै हेठ आए दे चिशोती दा लाया दौरा, प्रभावितें लेई अनुग्रह राहत राशि दी कीती घोषणा।
- सेहत सुविधाएं गी बेहतर करने दी इक बड्डी कोशिश तैहत जम्मू-कश्मीर दे नमें सरकारी मैडिकल कालजें आस्तै असिस्टेंट प्रोफैसरें दियें 105 असामियें गी मंजूरी दिती गेई।
- जंगलात मंत्री जावेद राणा होरें पुंछ दे जॉगर पार्क दा दर्जा बधाने दा दिता निर्देश। Track गी बधाने ते पार्क दी सतह मसनूई करने दे दिते आदेश।
- मौसम विभाग नै अलर्ट घोषित करदे होई कल्लै थमां 19 अगस्त तक जम्मू-कश्मीर च गज्जी चमकियै भारी बरखा, हाड़ें ते जिमीं खिसकने दी कीती पेशगोई।

<><><><><><>

LG Cloudburst

उपराज्यपाल मनोज सिन्हा होरें अज्ज वरिष्ठ अधिकारियें कन्नै गल्लबात कीती ते चानचक्क हाड़ें दे परैन्त किश्तवाड़ दे चशोती च चला रदे बचा ते राहत कम्में दा जायजा लैता। सोशल मीडिया पर इक पोस्ट च एल.जी होरें वायदा कीता जे, सब्भै तबाह होए दे घरें दा परतियै निर्माण कीता जाहग। उनें अधिकारियें गी प्रभावत परोआरें गी फौरी मदाद ते लाजमी चीजें दी लगातार आपूर्ति दी गारंटी देने दे निर्देश दिते। एल.जी. होरें आपदा कन्नै प्रभावत लोकें आस्तै तेजिया कन्नै कारवाई ते व्यापक समर्थन दी लोड़ पर जोर दिता। सेना, राष्ट्री आपदा मोचन बल, राज्य आपदा मोचन बल ते स्थानी अधिकारियें लापता लोकें गी तुप्पने ते बचे दे लोकें दी मदाद यकीनी बनाने आस्तै अनथक जतन करा करदे न ते प्रभावित खेतर च बचा अभियान अजें बी जारी ऐ।

<><><><><><>

CM Chasoti

मुख्यमंत्री उमर अब्दुल्ला होरें अज्ज किशतवाड़ दे चशोती ग्रां दा दौरा कीता ते बद्दल फटने करी, चानचक्क हाड़े कन्नै उत्थें होई दी तबाही दा जायजा लैता। आकाशवाणी जम्मू दे संवाददाता मुजब, राहत ते बचा आहले कम्में दी दिक्ख-रिक्ख करा रदे, सैना दे इक वरिष्ठ अधिकारी नै मुख्यमंत्री होरें गी अभियान दी प्रगति बारे जानकारी दिती। मुख्यमंत्री होरें गी हाड़ें कन्नै होए दे नुक्सान दे पूरे प्रभाव गी समझने आस्तै इक वर्चुअल रियलटी हेडसेट बी दिता गया। ग्रां च वर्तमान च इक समन्वित बचा ते राहत दी कोशश जारी ऐ।

<><><><><><>

CM Ex-Gratia

मुख्यमंत्री उमर अब्दुल्ला होरें मुख्यमंत्री राहत कोष थमां चशोती हादसे कन्नै प्रभावित लोकें आस्तै अनुग्रह राहत दी घोषणा करदे होई आक्खेया ऐ जे मरने आहले दे परोआरें गी 2 लक्ख रपे, गंभीर रुप कन्नै जख्मी होए दे लोकें गी इक लक्ख रपे ते मामूली सट्ट लग्गनें आहले व्यक्तियें गी 50 ज्हार रपे दा मुआवजा दिता जाहग। ईमारतें गी पुज्जे दे नुक्सान आस्तै 25 ज्हार रपें शा इक लक्ख रपें तगर दा मुआवजा दिता जाहग। पूरी चाली कन्नै क्षतिग्रस्त ईमारतें गी इक लक्ख रपें, ओह ईमारतां जिनेंगी बड़ा मता नुक्तान पुज्जेया ऐ उनेंगी 50 ज्हार रपे ते मामूली तौरा पर क्षतिग्रस्त ईमारतें आस्तै 25 ज्हार मुआवजा दिता जाहग। प्रभावत खेतर च बुनियादी ढांचे गी फौरी तौरा पर ब्हाल करने दा बी हुक्म दिता गया ऐ।

<><><><><><>

MoS Press Conference

केन्द्री मंत्री डाक्टर जितेन्द्र सिंह होरें अज्ज GMC जम्मू दा दौरा कीता ते किशतवाड़ च बददल फटने दी त्रासदी च जख्मी लोकें दी डोल पुच्छी ते उन्दे कन्नै गल्लबात कीती। उनें उनेंगी उन्दे इलाज ते पुर्नवास आस्तै पूरी मदाद दा भरोया दोआया।

<><><><><><>

JKRTC Free Buses

जे.के.आर.टी.सी. ने मचेल माता यात्रियों आस्तै जम्मू तगर मुफ्त बस सेवां शुरु कीतियां न, जेहदा मकसद हाल च गै आए दे चानचक्क हाड़ै कन्नै प्रभावत तीर्थ यात्रियों दी सुरक्षत वापसी यकीनी बनाना ऐ। ए.आर.टी.ओ किशतवाड़ तसलीम वानी होर, जे.के.आर.टी.सी. दे अधिकारियें कन्नै लोकें आस्तै बिना कुसै परेशानी दे ट्रांस्पोर्ट सेवा प्रदान करने लेई इस अभियान पर नेड़मी तक्क रक्खा रदे न। इस सोशल मीडिया पोस्ट च ट्रांस्पोर्ट कमीशनर विशेष पाल महाजन होरें जानकारी दिती ऐ जे, जे.के. स्लीपर बस एसोसिएशन बी मुफ्त बस सेवां प्रदान करने आस्तै अगगे आया ऐ। अधिकारी एह पक्का करने आस्तै 24 घैंटे कम्म करा दे न, जे सारे यात्री सुरक्षत रुप कन्नै अपने घरें तगर परतोई जाह्न।

<><><><><><>

Itoo Health Care

सेहत सहूलतें ते नौजवानें गी सशक्त करने आहली भेठा इक बड़ी गैंह पुटदे होई जम्मू-कश्मीर दे मंत्रीमंडल नै 7एं नमें सरकारी मैडिकल कालजें च असिस्टेंट प्रोफैसर दियां 105 असामियां पैदा कीतियां न। फैसले मुजब हर इक सरकारी मैडिकल कालेज गी 15 पोस्टां दितियां जागंन। एहदे गितै सिद्दी भर्ती लेई जम्मू-कश्मीर लोक सेवा आयोग JKPSC एह असामियां पुर करने लेई आक्खेया गया ऐ। शिक्षा मंत्री स्कीना इत्तू होरें अपनी इक सोशल मीडिया पोस्ट राहें एह जानकारी दिती ते आक्खेया जे इस गैंह दा मकसद मैडिकल शिक्षा गी तगड़ा करना ते प्रांतै दे प्रतिभाशाली ते योग्य डाक्टरें गी रोजगार दे नमें मौके हासल करोआना ऐ, जेदे नै जम्मू-कश्मीर च सेहत सरबन्धी सरिस्ते गी होर बेहतर कीता जाई सकोग।

<><><><><><>

Rana Poonch

जंगलात ते जनजातीय मामले मंत्री जावेद अहमद राणा होरें अज्ज पुंछ दे शेरे-कश्मीर पुलै कश जांगर पार्क दा दौरा लाया ते पार्क दे ढांचागत विकास लेई सिंचाई ते हाड़े दी रोक आहले मैहकमे गी निर्देश दिते। उनें अफसरें गी जांगिंग पार्क गी पुलिस लाइनज तोड़ी बधाने ते ओदी सतह मसनूई करने लेई इक ब्योरेबार प्रोजैक्ट रिपोर्ट तयार करने लेई बी ताकीद कीती। जिसलै एह जांगिंग पार्क बेहतर होई जाग, तां स्थानीय बसनीकें गी दरेया दे कंडे शैल-सुनाहकी आधुनिक हर सहूलत कन्नै लैस जांगिंग करने लेई थाहर उपलब्ध होई जाग। इस गैंह दा मकसद

पुंछ च शारीरिक फिटनेस गी बधाने ते पुंछ च सार्वजनिक थाहरें गी बेहतर करियै स्थानीय बसनीकें दे जीवन दा म्यार बधाना ऐ।

<><><><><><>

Janmashtmi

अज्ज पूरे देसै दे कन्नोकन्नी जम्मू च बी जन्माष्टमी यानि ठौगरे दा बरत पूरी श्रद्धा ते उत्साह कन्नै मनाया जा रदा ऐ। बडुलै सवेला थमां गै श्रद्धालू ठौगर द्वारें च जाइयै भगवान कृष्ण दे बाल रुपै गी मत्था टेका रदे न ते आशीर्वाद प्राप्त करा रदे न। अज्ज केइयें कृष्ण मंदरें जियां इस्कॉन वगैरा च बड्डे आयोजनें दा सरिस्ता कीता जा रदा ऐ। अज्ज लोक बरत रक्खदे न ते बन्न-सबन्ने फलाहार बनाइयै खन्दे न। रातीं 12 बजे तक र मंदरें ते घरें च वशेष पूजा-अर्चना कीतियां जन्दियां न ते भगवान कृष्ण उन्दे रातीं 12 बजे धरती पर अवतरण गी बड़ी गै श्रद्धा कन्नै मनाया जन्दा ऐ। ठौगरें दे बरतै आले दिन गुडियां चाढ़ने दी प्राचीन परम्परा ऐ। जम्मू दे गासै पर रंग-बिरंगियां गुडियां ते गुड्डे नजरी आवा रदे न। बडुलै बरखा करी उयां गुडियां बुत्त नेई होई सकियां पर बरखा च दना ठमकैर लग्गदे गै गास गुडियें कन्नै भरोई गया।

<><><><><><>

Weather

मौसम विभाग नै औंदी 17 थमां 19 अगस्त तोड़ी अलर्ट जारी कीता ऐ। जम्मू डिविजन दियें केइयें थाहरें जियां जम्मू, रियासी, उधमपुर, राजौरी, पुंछ, साम्बा ते कठुआ सनें होरनें थाहरें हौली थमां मध्यम दर्जे दी बरखा पौने दी पेशगोई कीती गेई ऐ। डोडा, किश्तवाड़, रामबन ते कश्मीर दे केइयें हिस्सें च तेज हवा चलने ते भारी बरखा पौने दा खदशा बने दा ऐ। पहाड़ी इलाकें च बददल फटने, हाड़ औने पस्सियां पौने ते पत्थर डिगने दा खतरा बने दा ऐ। लोकें गी दरेयाएं-नालें थमां शिंडे रौहने दी सलाह दिती गेई ऐ। सैलानी ते यात्रु सोची-वचारियै अपनी यात्रा दी योजना बनान।

<><><><><><>

AIIMS JMU

अखिल भारती आर्युविक्षान संस्थान AIIMS जम्मू नै राष्ट्रीय सतह पर Outlook मैगज़ीन दी 2025 बरे आली सरकारी मैडिकल युनिवर्सिटियों दी रैंकिंग च 7मीं थाहर हासल कीती ऐ। AIIMS दिल्ली 6मीं थाहरै पर ऐ। इक हजार चां 910 इशारिया 2-2 दा स्कोर हासल करियै AIIMS जम्मू शिक्षा, शोध, बुनियादी ढांचे ते प्रशासन दे स्हाबै उत्कृष्ट पाया गया ऐ। इत्थे अजें तकर 2 लक्ख 60 हजार मरीजें दा Out Patients दे तौर ईलाज कीता गया ऐ ते इक ज्हार 8 सौ आप्रेशन कीते गे न। AIIMS जम्मू च Transfusion Medicine Unit ते इक अति आधुनिक Genomics केन्द्र बी मौजूद ऐ। AIIMS दे कार्यकारी निदेशक डाक्टर शक्ति कुमार गुप्ता होरें इस सफलता दा श्रेय दूरदर्शी नेतृत्व ते राष्ट्रीय सेहत सरबन्धी पहलकदमियें गी दिता ऐ।

<><><><><><>